

陶雲汀先生奏疏

奏疏卷四目錄

江督稿

安化陶澍

籌定堵緝粵私章程摺子

淮商捐賑併動鹽義倉穀散濟揚屬災黎摺子  
回空軍船請照上年巡緝夾私章程查禁摺子  
陞補六安直隸州知州摺子

請將淮北滯岸試行票引章程摺子 又附片

兩淮應解南河工需請分別改撥摺子

棍徒乘荒聚衆挾制官長飭懲情形摺片

上元等六縣麥收歉薄請分別緩徵摺子

災地各營兵丁借支銀米摺子

挈獲習教逸犯解京審辦摺片

籌定堵緝粵私章程摺子

奏爲籌定堵緝粵私章程併嚴覈功過以期疏銷  
恭摺

奏祈

聖鑒事竊照江西南昌等十府爲淮鹽綱地歲額應  
銷二十七萬七千餘引頻年滯銷日甚實由福  
建浙江廣東三省接壤之區鄰私侵灌而粵私  
爲害尤甚蓋緣粵省地居贛州府之上游贛州  
一廳八縣例食粵鹽粵省雄贛埠之鹽行銷贛  
縣由西河而至郡城西關其潮橋埠之鹽則行

銷興國雋都會昌長寧等縣東江埠之鹽則行  
銷定南信豐龍南安遠等廳縣本自各分疆界  
其地又均在贛縣之上游其鹽本不應行至贛  
縣乃潮橋東江二埠借官隱私亦由東河而至  
郡城東關蔓延於贛縣各鄉併聚於攸鎮侵越  
淮界在維贛埠應銷之贛縣引地甘爲潮橋東  
江二埠侵佔者皆以淮綱爲壑其鹽同集于攸  
鎮以致淮界日促淮鹽愈滯伏思抽稅旣不可  
行緝私自不容緩不扼其要無以杜來源不絕  
其弊無以塞去路稽查周而後鄰私斂跡賞罰

明而後官兵振作現當竭力整頓之際自當因時制宜因地變通庶可收實效而有起色茲據原任贛州府知府陳煦周歷吉安贛州各處逐一查勘悉心推求相機定擬章程稟經鹽法道余正煥兼署藩司劉重麟會同條議具詳前來臣等詳加考覈所議實皆允當敬爲我

皇上陳之

一萬安縣良口市宜添卡堵緝也查萬安毗連贛縣其所轄之良口市在萬安上游百餘里而其距萬贛兩縣分界之水西坑則僅止里許實爲

粵私入淮門戶應請增設大卡派委文武各員帶兵二百名駐劄該處以資控制查萬安縣原設之觀瀾卡羅塘卡兩處均派有遊擊都司各帶兵丁五十名近因梟船在良口市以下萬安城以上偷泊私售應卽將此二卡官兵移駐良口市其吉安府城外原委該營叅將帶兵一百名無關緊要應行裁撤另由贛標各營派委守備或千總各一員兵丁各五十名併委文職丞倅二員巡役二十名均駐良口市會同嚴密查拏至良口市以下水陸各路由良口市委員內

輪流梭織巡邏以杜私販繞道之弊足資兼顧  
其萬安縣城外原設芙蓉朝陽二卡仍循其舊  
以防良口市之疎漏如此一轉移間兵不加多  
布置更爲周密矣

一龍泉縣之湯村塘宜增官卡也查湯村塘爲攸  
鎮私鹽挑運至龍泉永新安福永寧蓮花廳必  
由之路原設卡商一名巡丁八名實形單弱應  
請添派守備或千總一員兵二十名佐雜一員  
巡役十名駐劄湯村卡督率商巡堵緝

一泰和縣之白洋垌宜添兵丁也查粵私由興國



縣而來挑運至泰和廬陵等縣鄉村售賣勢須經過泰和之白洋棚水見坑浪川岡東門嶺四處而白洋棚尤爲緊要該處現設有卡相距水見坑浪川岡東門嶺不遠原可責令兼巡惟原派汛弁一員兵丁二十五名卡商一名巡役二十名分路查拏未免顧此失彼應請酌委守備或千總一員添兵二十五名併派佐雜一員巡役十名會同駐卡隨時督率商巡兵役周歷巡緝不使株守一處以防偷越

贛縣東河上游茅店地方宜設卡以防透漏也

查潮橋東江二埠私船由東河茅店至磨角過  
贛郡東關蔓延贛縣各鄉併聚於攸鎮以致雄  
贛埠與淮界同受其害前於磨角設卡堵截旋  
因私販改由白澗灘下船又改白澗灘設卡磨  
角一處仍派贛縣縣丞稽查至道光元年粵省  
奏明各歸本界設卡遂將磨角白澗灘各卡裁撤  
伏思雄贛潮橋東江三埠雖皆係粵鹽然各有  
應銷地方贛縣官商於贛縣本界設卡並非越  
境今雄贛埠之鹽既不淮其侵越淮界則潮橋  
東江之鹽應先不准其侵佔贛縣方能清其源

以截其流應請卽於茅店設卡酌派守備或千  
總一員外委一員帶兵四十名水陸兩路周流  
巡緝則潮橋東江私鹽自不能越茅店而至下  
游之贛縣庶各守名界雄贛埠與淮界均受其  
益至一切經費應令雄贛埠與淮南商均派以昭  
公允

一雄贛埠應銷粵鹽運至贛縣西關宜點驗註冊  
上倉也查贛縣境內分爲愛敬長興大有四會  
章水雲泉六鄉每年額銷雄贛埠粵鹽二萬五  
千八十餘包每包一百五十觔共計三百七十

六萬二千餘觔此外卽有融銷亦不過倍於原額仍查章水雲泉二鄉之攸鎮大湖江等處逼近淮界開設之子店熬鍋每日約可出鹽八九萬斤每年約共出鹽三千餘萬觔逾於通縣歲額八九倍影射弊混不可勝言究之粵省亦銷滯引積是有損於淮無益於粵歷來挈獲私販無非買自攸鎮大湖江二處皆有舊案可查應請責成贛南道將粵省雄贛埠運到鹽包於過關時點驗註冊飭令上倉其轉發各鄉併攸鎮大湖江等處亦令報數點驗註冊然後放行一

面將每月到鹽若干分運贛縣各鄉及攸鎮大  
湖江各若干造冊移送鹽道轉請咨查粵省是  
否與派撥鹽數相符分別覈辦庶贛商不敢任  
意夾帶於粵省官引毫無格碍可杜藉官行私  
侵佔淮綱之弊

一嚴定功過賞罰以示勸懲也查各處鄰私如果  
卡員認真查拏無私不獲各州縣切實審辦有  
犯必懲根究私鹽來歷嚴懲鄰店之行私窩藏  
之囤戶則梟販何至肆行無忌粵引各州縣狗  
私坐視淮引各州縣姑息養奸卡巡員弁復坐

糜經費甚至兵役勾串賄庇應請嗣後每季查明各縣銷數如較往年能有起色或獲私較多將各員弁量予記功倘銷數無起色或獲私較少將各員弁記過俟年終覈明通年各屬實在溢銷缺銷分數將各卡員弁據實咨部照例分別議敘議處其地方官功過相抵者應毋庸議記功多者請予議敘記過多者酌加查叅如有任聽兵役勾串賄庇及地方官承審鹽案仍前含糊輕縱者專案叅究總期信賞必罰庶勤能益加奮勉怠玩其知儆惕則梟販潛踪隣私歟

跡可期日漸暢銷矣

以上六條臣等往返札商悉心計議以期杜私疏引除毘連閩浙各界址原設卡巡現飭勘議查辦外所有籌堵粵私緣由理合會同恭摺具奏伏乞

皇上聖鑒訓示謹

奏

道光十二年四月十八日具

奏五月初十日奉到

硃批該部議奏欽此

部議  
覆准

淮商捐賑併動鹽義倉穀散濟揚屬災黎摺子  
奏爲淮商公捐銀兩併酌動鹽義倉穀散濟揚屬  
災黎恭摺奏

聞仰祈

聖鑒事竊照揚州府屬上年五六月間雨水過多江  
潮泛漲兼之高郵州境馬棚灣等處堤工漫溢  
水注下河勢若建瓴以致各州縣田畝被淹成  
災較重貧民乏食度日維艱經臣等疊次  
奏蒙

聖恩撫賑兼施復又飭屬勸諭紳商捐輸接濟據署



兩淮鹽運使俞德淵詳據淮南辦運商人黃滌  
泰等稟稱念切桑梓公同集議情願捐繳銀五  
萬兩併酌撥鹽義倉穀五萬石以備揚屬被水  
災區冬春接濟及資送流民回籍之用飭據揚  
州府按照各州縣災分輕重均勻派撥赴司具  
領散給茲各州縣俱已放竣據該署司具詳請  
奏前來除飭取用過銀穀細冊送覈併飭諭各商  
將動撥鹽義倉穀一俟秋成豐稔卽照數買補  
還倉以歸貯備外

臣

謹會同護理江蘇巡撫蘇

州布政使

臣

梁章鉅合詞恭摺具

奏伏乞

皇上聖鑒謹

奏

道光十二年四月十八日具

奏五月初十日奉到

硃批知道了欽此

回空軍船請照上年巡緝夾私章程查禁摺子  
奏爲回空軍船夾帶私鹽請照上年巡緝章程嚴  
行查禁竝飭堵川私潞私以冀疏銷恭摺具奏  
仰祈

聖鑒事竊照各省軍船回空向自天津至江南一帶  
沿途裝載私鹽侵銷引地最爲淮綱之害而安  
徽江西湖北湖南等幫爲尤甚上年節次欽奉  
諭旨飭令直隸山東各省督撫及漕督鹽政諸臣於  
軍船經過地方節節盤查嚴防透漏行抵江南  
界內卽由臣遴派文武員弁分投堵緝時當整

頓之初在事大小人員仰遵

聖訓俱能實力查禁私鹽顆粒不能上船幫下水手亦皆畏懼守法糧私得就肅清實從來所未有本年軍船現已開行北上轉瞬回空誠恐各幫丁舵人等意存牟利妄冀堵緝稍寬復萌故智該管員弁又或日久懈生致夾帶之風息而復起於兩淮綱食各岸大有關繫現值疏銷喫緊之際不可不預爲之防除俟屆期仍由臣遵照上年奏案分段派委幹員認真巡緝外惟是接挈於已經夾帶之後不若飭禁於未經裝載之

先應請

勅下直隸總督山東巡撫長蘆鹽政各飭所屬於軍  
船經過之處仍照上屆章程嚴密稽查不准私  
鹽售賣上船如有土梟風客囤積鹽觔跟幫上  
載一併訪拏究治至回空軍船例有總運丞倅  
又有各幫押空衛弁耳目切近稽察易周果能  
各禁各幫尤易爲力應由漕臣嚴諭押空員弁  
自行防範如有於例帶食鹽之外私帶鹽觔立  
卽起除淨盡併治以應得之罪倘該員弁等不  
能實力查禁抑或有心徇庇一經接獲照例嚴

加叅處務使積年宿弊永遠肅清於鹽務大有裨益抑臣更有請者兩淮引地莫大於湖廣而湖廣私鹽莫多於川潞上年回空糧私淨盡官鹽自應暢銷乃入春以來楚岸銷數轉不及去冬之暢固緣上年被水成災當青黃不接之時民力拮据以致銷數較絀亦實由川私潞私乘機侵越日甚致佔淮綱查潞私由河南南陽等府充斥襄樊下游安陸荊門胥被侵灌川私則由夔關而下直達宜昌荊州接舸連橋尤爲楚岸大害近年湖北銷數往往不及湖南是其明

証若不嚴行堵截卽使糧私淨絕仍難望淮引  
疏銷亦應請

旨勅下四川總督河南巡撫嚴飭夔州南陽各府於  
各境內認真查禁勿任偷越行私竝由湖廣督  
撫選派明幹文武員弁於川豫接壤要隘分投  
實力堵截查拏以靖私源而利官運至江船夾  
帶及買硃放觔等弊臣隨時查禁不敢稍懈竝  
經湖廣督撫嚴稽水程委員弔硃防閑甚爲周  
密似內私之弊實可漸就廓清所有籌議查辦  
糧私及嚴堵川私滯私各緣由理合恭摺具

奏伏乞

皇上聖鑒訓示謹

奏

道光十二年四月十八日具

奏五月初十日奉到

硃批另有旨欽此同日奉到四月三十日內閣奉

上諭陶澍奏查禁回空軍船夾帶私鹽竝嚴堵川私  
潞私一摺各省軍船回空沿途裝載私鹽侵銷引  
地最爲淮綱之害上年節次降旨飭令經過各省  
督撫消督鹽政諸臣督飭所屬節節盤查嚴防透



漏糧私得就肅清本年軍船北上轉瞬回空誠恐夾帶之風息而復起於兩淮綱食各岸大有關係著直隸總督山東巡撫長蘆鹽政嚴飭各屬於軍船經過之處仍照上屆章程嚴密稽查不准私鹽舊賣上船如有土梟風客囤積鹽觔跟幫上載務卽訪拏究治竝著漕運總督嚴諭押空員弁隨時防範遇有私帶鹽觔立即起除淨盡竝治以應得之罪倘該員弁等不能實力查禁抑或有心徇庇卽行嚴加叅處至潞私由河南南陽等府充斥襄樊下游安陸荊門胥被侵灌川私由夔關而下直

達宜昌荊州尤爲楚岸大害自應認真堵截俾淮  
引得以疏銷著四川總督河南巡撫嚴飭夔州南  
陽各府於各境內實力認真查禁勿任偷越竝著  
湖廣督撫選派明幹文武員弁分投於川豫接壤  
要隘堵截查拏以靖私源而利官運欽此

陞補六安直隸州知州摺子

安撫會稿

奏爲直隸州知州員缺緊要仰懇

聖恩俯准揀員陞補以裨地方事竊照六安直隸州知州孫靈府才難治劇業經臣等奏奉

諭旨以中簡缺知州改補在案所遺員缺係繁疲難兼三要缺例應在外揀選調補該州界連楚豫萬山叢雜最易藏奸且管轄英山霍山二縣訟獄紛繁必得精明強幹之員方足以資撫輯臣等與藩臬兩司於通省丞倅直隸州及府屬知州內逐加遴選非現居要缺卽人地未宜實無

堪以勝任之員惟查有合肥縣知縣金石聲年四十三歲浙江進士由庶吉士散館引

見奉

旨以知縣卽用選授安徽東流縣知縣道光三年十二月二十六日到任道光六年

大計卓異引

見奉

旨金石聲准其卓異加一級仍註冊回任候陞欽此八年七月二十二日回任調補今職九年八月三十日奉文到任接算前任東流縣歷俸三年

以上該員守潔才優老成穩練現署懷寧縣知縣上年水災辦理撫賑勸捐事事均臻妥協在知縣中最爲誠實可靠且係曾經保薦卓異奉旨候陞人員以之陞補六安直隸州要缺知州實堪勝任惟六安州係屬調缺例應先儘現任人員調補今以該員請陞與例稍有未符但人地實在相需例得專摺

奏請據藩臬兩司會詳前來  
臣等往返札商意見相同合無仰懇

皇上天恩俯念員缺緊要准以合肥縣知縣金石聲

陞補六安直隸州知州實於地方吏治均有裨益如蒙

俞允另行給咨赴部引

見恭候

欽定再查定例題調要缺任內一切因公處分俱毋庸計算又道光六年吏部通行嗣後保薦卓異陞用人員任內如有盜案正項錢糧等案處分仍准陞用各等因該員金石聲前在東流合肥等縣雖有未完正項錢糧暨承緝盜案等項處分惟係保薦卓異應陞人員遵例毋庸計算至

該員由東流縣調補合肥縣現請陞補六安州  
係屬再陞所有奉議罰俸銀兩遵照部咨飭令  
依限完繳咨部銷案所遺合肥縣知縣要缺咨  
另遴員請補合併陳明謹合詞恭摺具

奏伏乞

皇上聖鑒勅部覈覆施行謹

奏

道光十二年四月三十日會

奏五月二十五日奉到

硃批另有旨欽此同日奉到五月十三日內閣奉

上諭陶澍等奏揀員陞補直隸州要缺知州一摺著  
照所請安徽六安直隸州知州員缺准其以金石  
聲陞補照例送部引見該部知道欽此



請將淮北滯岸試行票引章程摺子

奏爲淮北湖運綱鹽滯岸及食鹽各岸試行票鹽  
酌議設局章程仰祈

聖鑒事竊臣前因顧毓梁中靖卓秉恬等條奏有鹽

歸場竈設局徵稅之議經臣議以兩淮鹽課

甚重若改歸場竈恐致價隨稅長場鹽偷漏必

多課稅更細未敢輕議更張惟淮北滯岸久已

無鹽接濟商疲課細必須另籌辦理請仿照浙

江山東票引兼行之法於海州所屬之中正板

浦臨興各場設局抽稅並委降調淮揚道鄒錫

淳前往查辦一切章程仍與署運司俞德淵會議妥辦奏蒙

恩准在案茲據鄒錫淳帶同委員分路查勘情形會同署運司俞德淵籌議設局收稅章程具詳請奏前來臣復逐加查覈所有淮北綱鹽其行安徽河南兩省四十一州縣內除安徽江運八州縣暨安徽河南湖運暢岸十一州縣近雖商疲引積尙非極敝之區有商認運者仍令商辦其商力支絀不能兼顧者官督商運一切照舊辦理外惟安徽之鳳陽懷遠鳳臺靈璧阜陽潁上亳

州太和蒙城英山泗州盱眙天長五河河南之  
汝陽正陽上蔡新蔡西平遂平息縣確山二十  
二州縣例由湖運稱爲極滯久已商逋課欠配  
運不前歷年以來屢施調劑之方迄無成效又  
江蘇之山陽清河桃源邳州睢寧宿遷贛榆沐  
陽八州縣係淮北食鹽口岸向因私充官滯錢  
糧由綱商攤帶食商行無課之鹽近則費重銷  
絀食商配運亦復寥寥計滯岸二十二州縣內  
除天長一縣運道例由山陽寶應入高郵湖與  
淮南引地錯雜應仍歸商運以固藩籬外其餘

二十一州縣應與食岸八州縣一律變通改行  
票鹽以資補救又安東海州兩州縣鹽法志載  
逼近鹽場例不銷引查安東距最近之板浦場  
已一百餘里較沐贛距場爲遠海州逼近場地  
原可參用籌鹽之法惟淮北私梟竝不赴場總  
係掃丁挑赴數十里外各村鎮賣與秤手頭家  
轉售梟販若籌鹽一行此風仍難盡絕且緝私  
各卡固有籌鹽名目其不肖者必致任意賄縱  
一經挈獲私販必藉口買自籌擔而透私之場  
丁與得賄之兵役皆得置身事外亦應與安東

改行票鹽以歸畫一或以票鹽有課居民食貴  
爲慮不知海州東南北三面皆場得鹽甚易日  
食所資無須籌擔其零觔購用原無票稅可言  
况以現定科則計之居民卽日食票鹽三錢亦  
終歲不過用銀二分零不足病民而籌擔一靖  
實可杜私未便瞻顧致誤全局至鹽法首重緝  
私而滯岸尤私鹽薈萃之所緝私從嚴一分則  
票鹽多銷一分現在勘定要隘卽於鄰近場地  
之海州東海錢家集三營挑選千把外委十一  
員兵二百七十名分卡巡防如果實力查緝銷

數漸旺由臣隨時獎拔倘視爲具文虛糜巡費  
卽將弁兵斥革懲辦務使信賞必罰以收實效  
至局商必須得人方不至勾結奸販致啟影射  
夾帶之弊現據選保殷商王允泰等承充臣仍  
飭該運司委員等隨時查察倘有弊端立即斥  
革懲辦所有籌議設局收稅章程謹另繕清單  
恭呈

御覽臣一面移咨皖豫兩省出示招徠民販赴場領  
票買鹽至票鹽事關創始必有以少課及奸販  
滋弊爲虞且慮旁侵暢岸漸及淮南者然淮北

自十數年來引滯岸懸幾於無課可收且虛糜  
調劑銀兩不下百萬此時淮南商困未甦何能  
再籌款項調劑淮北且如辛卯一綱淮北配運  
不及十分之二各岸久爲私販佔據今民販之  
赴場旣由州縣給照票鹽之出場又有卡員驗  
放與其任無課之私鹽肆行侵佔又不若行少  
課之票鹽尙可稽查其湖運暢岸與淮南各岸  
果能畫界自守則非商運之鹽不能侵越若巡  
緝疎懈私鹽且將充斥又何責乎票鹽現值商  
力疲極課項久懸而各岸又需鹽甚急接濟爲

難舍此亦別無籌策臣惟有督飭運司及鄒錫淳等妥帖經理如果行之有效課稅漸充再行推廣辦理倘有流弊亦無難卽行停止所有籌議淮北試行票鹽設局收稅章程各緣由理合恭摺具

奏伏乞

皇上聖鑒訓示謹

奏

謹將淮北湖運綱鹽滯岸及食鹽各岸試行票鹽籌議設局收稅章程繕具清單恭呈



御覽

一由運司刷印三聯空白票式一爲運署票根一  
畱分司存查一給民販行運以板浦中正臨興  
三場各取上一字編立號數蓋用運司印信頒  
發三場大使收貯民販納稅請票時該大使於  
票內填註民販姓名籍貫運鹽引數往銷州縣  
按道里遠近立限到岸聽其銷賣運鹽出場由  
卡驗放不准越卡亦不准票鹽相離及侵越別  
岸違者竝以私論其照票給販赴所銷州縣衙  
門呈繳由該州縣按月申繳運司查覈其裁存

票根卽由本場大使按旬造冊彙繳運司以備  
覈對存查之票亦按旬申送分司備案

一每鹽四百觔爲一引場鹽價照現在錢價合銀  
六錢四分抽稅照商運科則酌減三分之一計  
銀七錢二分又傾鎔解費設卡經費各衙  
門書役紙飯委員薪水緝私經費等項五錢二  
分通計一引四百觔共庫平紋銀一兩八錢八  
分此外不得分毫需索其捆工包索聽民販自  
行經辦出示曉諭一面行知各州縣遍示招徠  
給照來場買運

一滯岸各州縣招徠民販由該州縣給與護照載明姓名年貌籍貫給本人赴場買鹽其海州附近居民及各省客民在海州貿易者卽就近在海州請領護照俱赴場大使衙門呈照請票該大使於護照內用一驗訖戳記仍另立號簿登記備查卽將護照同所請照票發還本人其護照准行三年更換如實在本場居住衆所共知者免其請照祇用手本呈明姓名年貌居址赴本場衙門投遞局商加具保結准其一體請票販運至每票買鹽應自十引至百引以上爲一

票不得過於零碎惟食岸八州縣及向無額引之海州安東二州縣距場均在五百里以內應酌量變通海贛以百觔起票餘准一引起票以便民食至所領照票鹽數無多程途旣近往返必速卽令於買運後鹽時定限在本場大使衙門呈繳該大使仍按旬彙繳運司備查

一三場各鹽遠近多寡不一應於各場相度適中之地建立局廠以便竈戶交鹽民販納稅如板浦之東臨西臨等鹽地界毘連擬於西臨鹽設一局其大義于公等鹽海濱寫遠擬於水路聚

會之太平堰設一局中正等四疇地勢連屬祇於花朶垣設一局臨興場之正場等六疇相距六十餘里擬於臨浦設一局富安疇設一局統計三場暫設五局均由運司遴委委員每局一人常川駐劄遇有民販買鹽局商帶赴本場大使衙門隨時納稅請票再由本局委員於三六九日各照票載引數眼同民販逐包秤驗於照票後用局員銜名驗訖字樣戳記聽其出場倘中途查出包內多帶惟局員是問

一民販買鹽出場後必須由卡經過候卡員查驗

有無中途添買夾帶然後分赴指銷口岸其卡  
隘設在近場百里內外水陸必經之處查海州  
之房山係陸路要隘又大伊山吳家集俱係水  
陸交通要隘擬設三卡均由運司委員督查一  
年期滿另委接辦遇民販到卡驗票抽稱果係  
包數觔重相符卽於票內鈐蓋某卡委員銜名  
驗訖字樣戳記放行不得稽留需索倘查有夾  
帶卽移交地方官究辦其鹽包應以淨鹽一百  
觔爲一包每引四包三場一律照辦民販旣經  
卡驗其餘經過各關祇須驗票放行毋庸再事

檢查至經過州縣各有鹽捕衙門亦毋庸查驗  
以免擾累稽延運到認銷口岸赴當地州縣衙  
門繳票票內如無卡員戳記卽係越漏應照不  
應律懲治

一臨興所屬之唐口興莊柘汪三疇僻在海隅距  
該場不下百里三疇相去又各有二三十里陸  
路旣艱水道隔絕每年官商收鹽須沿海舟運  
至臨浦方入鹽河與各疇情形不同向設青口  
食鹽店歲銷贛榆縣食鹽三百引有名無實三  
疇產鹽本旺多賣魚船醃切今旣改行票鹽應

將食鹽店裁撤一律辦理惟地方遼濶局商多則經費難籌局商少又照料不及擬遴委妥員二人駐札青口經理漁船醃切及本邑食鹽照現定章程給票收稅以杜透漏

一運道必須肅清方可招徠查向來水陸私路如安東清河山陽盱眙泗州懷遠沭陽桃源宿遷睢寧邳州等處地界均有地棍土豪私立鹽關索費包送今改行票鹽民販一經納稅卽係官鹽誠恐各處惡棍習爲故常復向訛索倘不遂意難保無搶鹽之事提害商販應先行出示曉



論竝嚴飭地方文武認真查拏務使道路肅清  
匪徒歛跡倘有訛索搶鹽等事立拏匪棍從重  
懲辦如不獲犯照例開叅

緝私以防河爲扼要各場私梟透往皖豫引地  
總須渡過黃河查黃河渡口本有定所各河廳  
所轄多者五六處少者二三處其渡黃船隻係  
河員管理只將黃河兩岸各渡口認真稽查不  
許渡船載私則梟徒何能飛越查廳營及文武  
汛官各有修防重任原難責以緝私然渡口多  
在有工處所而渡船又向歸河員管轄但令稽

查渡船不准渡私則私鹽不緝而自靖應責成  
黃河北岸之邳北宿北桃北外北山安海安南  
岸之睢南宿南桃南外南海防海阜等十二廳  
營督率文武汛官稽查渡口一切官設私設渡  
船皆歸文武汛官專管倘渡船偷渡私鹽即將  
渡船水手挈交地方官無論人鹽會否竝獲但  
審有証據卽將渡船水手加重照窩囤私鹽例  
治罪官船另募管駕私船變價充賞

一暢岸運商如因引地毘連慮及票鹽侵越暢岸  
情願獨認旁近滯岸票鹽自固簪籬者卽呈明

本場大使轉報運司知照認岸毋庸另給民販護照惟運商之認滯原爲保暢起見所認滯岸既改票鹽其暢岸自應仍按原引完課無論銷數多少責令照額全納以免虛佔票地轉致暢岸缺銷至食鹽各岸竝無暢岸可顧無須獨認以廣招徠

一向來商認口岸文武衙門往往私設陋規書役更多需索本屬違例現行票鹽多係民人販賣資本無多所有皖豫兩省滯岸及江蘇食鹽口岸各衙門自不容向民販索取陋規惟胥役兵

陶澍奏請先定奏議卷之四  
丁仍恐藉端勒索一經民販訐告或別經發覺  
卽嚴行究辦以除積弊而肅鹺政

以上十條均就現在情形定議惟事係創始倘  
有未盡事宜或尙須變通盡利之處由該運司  
等隨時察看會詳分別辦理合併聲明

道光十二年五月初四日具

奏五月二十六日奉到

硃批依議妥辦戶部知道欽此

再臣查海屬鹽務向無善策文獻通考言天下之鹽皆可禁榷惟河北鹽是鹵地其地甚廣不待煎煮最易犯禁唐志亦言河北之鹽羈縻而已宋代亦嘗許通行量收稅錢每觔不過一文住賣二文是其利甚微自昔有然矣現查淮北每綱應徵課銀二十七萬二千餘兩不特歷來從未徵起而且虛耗調劑銀兩商疲力竭久已無人領運在皖豫之口岸則以無鹽可食催促甚迫在場池之掃丁又以有鹽無售困苦難堪勢不得不另籌辦法臣於四月二十五六日親

赴海州登雲臺經板浦四望鹽墮積素如山無  
款收買現在招徠民販運濟滯岸第販力更微  
轉搬不易卽暢岸之商亦多係虛懸誠恐各岸  
仍有缺乏必須籌備伏查上年

奏准借動庫款二十萬兩官督商運分濟各岸其  
時運鹽甫抵正陽關而需鹽之區卽有賈銀到  
關接買自行運回者是官運之法尙稱妥便惟  
庫項久已支絀別無閑款可籌其從前發商生  
息之帑本亦久化烏有空賠利息而無本可借  
祇能儘此二十萬兩之借款輾轉運以資接

濟應於票運商運之外仍酌運官鹽或暢岸商  
鹽有缺或滯岸票鹽不到卽委員運鹽濟售如  
有缺岸賈銀至正陽關者亦准其買鹽自運赴  
岸隨時相機辦理期於多運一分之鹽卽少懸  
一引之課設使票引不能流通有此官運之鹽  
亦可停止至設局收稅章程現於拜摺後卽一  
面咨明河南安徽巡撫檄飭應銷各州縣招販  
試行惟事係創始須俟察看半年後方能約計  
盈絀以定銷數所有淮北額引奏銷前經  
奏明劃出另辦應俟年底覈算情形再行具

奏合併陳明伏乞

聖鑒謹

奏

道光十二年五月初四日具

奏五月二十六日奉到

硃批戶部知道欽此



兩淮應解南河工需請分別改撥摺子

奏爲兩淮奉撥南河工需核計辛卯鹽課不敷應解請分別改撥以濟要工據實具

奏仰祈

聖鑒事竊臣接准戶部咨籌撥南河大汛工需銀一百五十萬兩內酌撥兩淮應報鹽課銀五十萬兩奉

旨依議欽此等因到臣遵查兩淮每綱應徵課額除織造銅觔等項係專案分解不入撥款外其正引鹽課併融綱陞課共銀一百七十九萬七千

三百三十二兩八錢一分均係奏銷後報部應撥及每年例解南河歲修三十萬兩之款今辛卯綱應徵前項銀兩內淮北應徵引課陞課銀二十七萬二千六百五十八兩一錢一分三釐現在銷引不及十分之二前經臣於請展

奏銷限期案內聲明請俟年底覈算再行具奏實計淮南應徵正課陞課銀一百五十二萬四千六百七十四兩六錢九分七釐又應徵帶運已庚正課銀三十八萬一千一百六十八兩六錢七分四釐共該銀一百九十萬五千八百四十

三兩三錢七分一釐內除前已解過奉撥辛卯年江寧兵餉十五萬兩案內銀十萬九千六百九十六兩三錢八分二釐辛卯甘肅兵餉三十萬兩案內銀二十五萬一千九百兩二錢九分三釐辛卯年例解河餉三十萬兩案內銀六萬兩又支給道光十一年場竈被災正展各賑及今春

恩賞口糧共銀十二萬三千一百二十五兩三錢五分二釐係

奏明動用正課作正開銷又支用過

奏撥已庚正課爲淮北官督商運銀二十萬兩撥  
借收買竈鹽銀十萬兩又奉部撥壬辰年江寧  
兵餉銀二十萬兩壬辰年甘肅兵餉銀三十萬  
兩壬辰年例解南河餉銀三十萬兩又應解歸  
還道光十一年奏准借撥淮揚關庫墊解辛卯  
河餉銀二十四萬兩計先後奉撥已解待解各  
款共已該銀一百八十八萬四千七百二十二  
兩二分七釐仍餘銀數止有二萬一千一百二  
十一兩三錢四分四釐現奉撥解河工銀五十  
萬兩實無存款可敷奏解且查辛卯正帶課銀

截至本年四月十九日止各商僅完過銀一百七萬四百餘兩其餘未完課銀實緣辛卯開綱時各岸均有積鹽又已丑已納未運之引舊積太多壓累新綱商力難於接濟兼之去夏各省被水轉運尤艱是以

臣前經

奏懇

天恩展限至八月奏銷嗣奉部議予限四個月展至六月造報現雖分別嚴催趕運完額而立限既促商力又疲即使屆期將全綱應完課銀掃數徵足而庫收銀兩亦止敷在先奉撥之銀此外

別無款項可以籌解惟現在大汛經臨爲期甚迫工需緊要難以稍遲可否仰懇

天恩勅部卽將兩淮辛卯鹽課內應行歸還淮揚兩關銀二十四萬兩撥解南河併將不敷銀二十六萬兩於附近藩關各庫改撥俾濟工需而免遲悞行據陞署兩淮鹽運使俞德淵具詳請

奏前來理合恭摺具

奏伏乞

皇上聖鑒

訓示施行謹

奏

道光十二年五月初四日具

奏五月二十六日奉到

硃批戶部議奏欽此

部議覆准

棍徒乘荒聚衆挾制官長飭懲情形摺片

再臣承准軍機大臣字寄道光十二年四月十七日奉

上諭江西南安文英龍泉永新各營均與湖南接壤著該督飛飭南贛鎮總兵張佑溪督率弁兵嚴密防堵仍隨時探聽倘賊勢披猖卽於所轄提鎮大員中飛調一員赴彼協同堵剿此時該督毋庸前往江西仍趕赴清江浦會同張井蘇成額督率放塘渡黃毋誤重運此爲至要等因欽此臣查本年重運漕船共計二千七百餘隻現已兩次灌放



幫船一千一百餘隻日內即可接放三塘江西

浙江已接續渡黃抵壩湖南尾幫亦於日內僨

抵儀徵駛入瓜口漕臣蘇成額逐日盤驗各幫

隨到隨行不致脫誤惟黃水較高灌放二塘之

後河口漸淤現經河臣張井設法疏通可無捫

口之患臣仍親駐督催務令以速補遲趕至夏

至前渡竣至湖南痞匪跳梁本極么麼此時兵

力既集計日即可掃除且去江西省交界尙遠

已飭南贛鎮張佑溪督率各營嚴密防堵期於

鎮靜臣自當遵

旨此時毋庸前往亦毋須另調提鎮大員往勦仍隨時察聽情形相機辦理斷不任稍有疎虞惟查江西省上年被水歉收今歲青黃不接糧價稍昂南安贛州兩府地瘠民貧風氣尤悍疊經知府李廷錫汪云任酌議平價設法勸糶併就近借穀接濟爲民籌食已屬不遺餘力而地方棍徒乘此歲荒挾制官長竟敢集衆擁入府堂肆行喧鬧此風斷不可長據該府等具稟前來臣已飛飭藩臬二司督率該府縣營速拏藐法之犯從嚴懲治以肅法紀而靖地方謹附片縷陳

覆

奏伏乞

聖鑒謹

奏

道光十二年五月初四日具

奏五月二十六日奉到

硃批另有旨欽此五月二十日承准

軍機大臣字寄五月十四日奉

上諭據陶澍奏江西省上年被水歉收今歲青黃不  
接糧價稍昂南安贛州兩府地瘠民貧風氣尤悍

興經該府等酌議平價設法勸糶併就近借穀接濟乃地方棍徒乘此歲荒挾制官長竟敢集衆擁入府堂肆行喧鬧現飭速拏懲辦等語上年江西省被水災區節經降旨加恩賑濟併地方官設法平糶爲民籌食已屬不遺餘力何以南安贛州兩府偶值糧價稍昂卽有棍徒聚衆擁入府堂喧鬧之事該處民氣強悍棍徒藉荒挾制目無法紀此風斷不可長必應嚴行懲辦著陶澍周之琦卽飭藩臬兩司督率該府縣營迅將首從各犯按名查拏務獲從嚴懲治毋任漏網以靖地方而肅法紀

將此各諭令知之欽此

上元等六縣麥收歉薄請分別緩徵摺子

蘇撫會稿

奏爲查明上元等六縣麥收歉薄請將應徵熟田

上忙新賦併未完舊欠懇

恩分別展緩以廣

皇仁而紓民力事竊照江寧府屬之上元江寧句容

高淳四縣淮安府屬之山陽清河二縣揚州府

屬之泰州前據具報因臘春雨雪過多天氣匝

寒麥田凍久未能一律透發業經

臣

梁章鉅於

三月分雨水糧價摺內附

奏情形一面飭司分別查勘確實詳辦去後茲據

江寧布政使趙盛奎詳稱飭據該管道府委員勘覆除泰州一境麥苗漸次轉茂尙屬有收堪以照常徵輸外惟查上元江寧句容高淳山陽清河六縣境內所種二麥均因凍久不能長發春收已屬失望現據上元縣知縣保先烈江寧縣知縣王埰句容縣知縣錢兆麟各稟稱縣境圩田上年被淹數月積水遲消雖下種不能發生其山鄉布種雖早因去冬今春雨雪交加天寒土凍根株黃萎未能暢發收成不無歉薄各請將應徵本年上忙熟田新賦一體緩至本年

秋後啟徵又據高淳縣知縣許心源稟稱縣境內豐成崇立遊五鄉被決各圩上年淹浸六月有餘及至水退節屆隆冬湖河結凍積水難消未及布種稍高田地勉強趕種亦不能長發其安興唐昌二鄉與災區毗連上年雖有薄收僅資口食入春以來陰雨時注天氣寒冷所種之麥甚屬瘦小請將應徵本年上忙熟田新賦緩至本年秋後啟徵又據山陽縣知縣唐汝明稟稱縣境上年被災較廣隣近熟田皆毗連災區收成有限入春以來冰雪沍寒麥苗凍損收成



歉薄請將道光十一年未完熟田錢糧及河灘  
學租併十二年熟田上忙新賦一體緩至本年  
秋後啟徵又據清河縣知縣王國佐稟稱縣境  
內人慶壽寧二鄉緣去臘今春雨雪相連冰凍  
兩月有餘二麥多被損傷卽聞有生發出土不  
過一二寸春收無望請將該二鄉應徵本年上  
忙新賦及上年未完下忙錢糧併節年舊欠一  
併緩至本年秋後啟徵各等情由司詳請具

奏前來

臣

等覆查上元江寧句容高淳山陽清河  
等六縣上年被災較廣其毘連災區熟田所種

二麥復因去臘今春雨雪過多麥苗凍損委係實在情形當此青黃不接之時若將新舊錢糧按忙啟徵民力實有未逮合無仰懇

皇上天恩俯准將上元江寧句容高淳山陽清河等六縣應徵本年上忙熟田新賦錢糧併山陽縣道光十一年未完熟田錢糧及河灘學租又清河縣人慶壽寧二鄉道光十一年未完熟田下忙錢糧併節年舊欠均緩至十二年秋後啟徵以紓民力感戴

聖恩實無紀極

臣

等謹合詞恭摺具

奏伏乞

皇上聖鑒訓示謹

奏

道光十二年五月初六日會

奏六月十二日奉到

硃批另有旨欽此同日奉到五月二十三日內閣奉  
上諭陶澍等奏上元等六縣應徵熟田新賦併未完  
舊欠請分別展緩一摺江蘇上元江寧句容高淳  
山陽清河等六縣上年被災較廣經該督等查明  
毘連災區熟田因今春雨雪過多麥苗凍損收成

歉薄當此青黃不接之時若將新舊錢糧按忙啟徵民力實有未逮加恩著照所請准將上元江寧句容高淳山陽清河等六縣應徵本年上忙熟田新賦錢糧併山陽縣道光十一年未完熟田錢糧及河灘學租又清河縣人慶壽寧二鄉道光十一年未完熟田下忙錢糧併節年舊欠概行緩至十二年秋後啟徵以紓民力該督等卽刊刻謄黃徧行曉諭毋任吏胥舞弊用副朕勤恤民隱之至意該部知道欽此

災地各營兵丁借支銀米摺子

奏爲災地各營兵丁分別請借兵餉銀米彙案具  
奏仰祈

聖鑒事查江蘇所屬各營兵丁偶遇災歉之年歷經  
奏請借給餉銀接濟有案上年江省入夏後大雨  
成災江湖頂漲沿江沿河一帶田地盡遭淹沒  
以致米價驟昂兵丁月餉不敷前據督協狼鎮  
各標協營請借餉銀均經

奏蒙

恩准借給嗣據泰興營請借餉銀又經

臣附片

奏明此外各營如有續行請借應查明是否坐落  
歉收地方照此分別辦理在案嗣據泰州揚州  
漕標中左右淮安城守鹽城東海海州併錢家  
集河標右營均因駐劄災區米珠薪桂兼值臘  
底嚴寒兵情困苦於上年冬間先後請借兩月  
兵餉以資接濟內泰州營借支銀一千一百七  
十四兩四錢四分四釐揚州營借支銀二千一  
百五十二兩所借之銀均請於道光十二年三  
月起分十個月扣還歸款又漕標中營借支銀  
九百兩左營借支銀七百三十八兩右營借支

銀七百五十八兩淮安城守營借支銀二千一百三十一兩鹽城營借支銀一千七百六十兩東海營借支銀一千一百四兩六錢海州營借支銀一千六百一十一兩錢家集借支銀五百二十二兩河標右營借支銀一千八百二十三兩均請將所借之銀從道光十二年秋季起分作六季扣還歸款各等情先後飭據江寧藩司議詳在司庫正項地丁銀內借給又據督標中左江寧城守左右四營請援嘉慶七年借米之案每兵續借米六斗在於河南採買米內動借

共借米一千四百一石六斗請於道光十三年  
三月起分十個月扣還當飭江寧府動放併據  
該府議以每石價銀二兩八錢移營屆期分月  
扣還又據溧陽營請循照道光四年之案借支  
一季餉銀一千一百八十三兩八錢於司庫地  
丁銀內動放併將上年借過米價銀五百九十  
六兩全數解還司庫報撥餘銀五百八十七兩  
八錢找借給領又借支一季米二百六十八石  
二斗於句容縣截漕應解省倉米內借給又浦  
口營請借一季兵米三百三十三石卽於江浦



六合二縣存倉米內借給所有溧陽浦口二營  
續借銀米均請於道光十二年秋季起分作六  
季扣還又奇兵營請借一季餉銀二千二百九  
十八兩三錢瓜洲營請借一季餉銀一千三百  
八十兩一錢五分均俟前借米價扣清卽從道  
光十三年春季起分作四季接扣歸款亦經先  
後由江寧藩司詳明分別放發又據三江營詳  
因駐劄江濱上年秋穀失收米糧昂貴兵丁月  
餉不敷買米請借兩月餉銀二百二十五兩三  
錢七分二釐及揚州營馬家橋等三汛兵丁請

借兩月餉銀一百八十兩查三江營及揚州營馬家橋三汛兵餉向於運庫支給亦經飭據兩淮鹽運司議詳借給所借之銀均自道光十二年三月起分十個月扣還歸款各在案茲據江寧布政使趙盛奎詳稱各標營兵丁請借兵餉及續借銀米均因上年自夏徂秋被淹日久食物昂貴兵情實在困苦是以一律請借雖所借銀米歸還時日各有先後不同統計扣至十三年年底均可盡一歸清不致延欠理合彙案詳請覈

奏併聲明督標中左二營江寧城守左右二營請  
借米石係於河南採買米內撥給其前項米價  
係動河南藩庫正款作正開銷應俟平糶事竣  
後卽由江省報撥今借給兵丁米價需俟道光  
十三年年底方能扣完報撥等情前來臣覆加  
查覈各營兵丁因災困苦委係實在情形自當  
卹體

皇仁一律借給俾窮兵口食有資感沐益無紀極除  
飭藩運二司分別按季扣還歸款以免庫項懸  
欠外謹會同護理江蘇巡撫蘇州布政使臣梁

章鉅合詞恭摺具

奏伏乞

皇上聖鑒謹

奏

道光十二年五月十七日具

奏六月十三日奉到

硃批另有旨欽此同日奉到六月初一日內閣奉

上諭陶澍奏災地各營兵丁分別請借兵餉銀米兼  
案具奏一摺江南各標營兵丁請借兵餉及續借  
銀米俱著分別按季扣還統計至道光十三年年

底全數歸款毋任稍有懸欠以清庫款欽此

拏獲習教逸犯解京審辦摺片

再

臣

承准軍機大臣字寄道光十二年五月初

九日奉

上諭本日軍機大臣會同富俊及刑部審擬尹老須  
卽尹資源習教煽惑一案前經行提之劉景業李  
克昌狄文奎狄漢符凝旺馬士成馬士標陳正業  
陳標賀學密著訥爾經額陶澍林則徐將該犯等  
迅速解部質明另結等因欽此

臣

查此案先准護

江蘇撫

臣

梁章鉅咨接准刑部咨緝各犯解京

卽經飛飭徐州府遴委署銅山縣王文炳馳赴

邳州會同該署州黃耀明查照刑部來咨編查  
州境並無沙灘溝裡二村地名另於泥灘村地  
方拏獲馬士成馬士標二名又在陳家樓訪獲  
陳標一名搜查家內俱無經卷簿籍傳單字蹟  
各犯亦訊無習教結會情事恐係恃無質証狡  
供避就比卽委令候補知縣顧毓奇於五月十  
四日由邳州押解馬士成馬士標陳標三名赴  
部質訊併飭署邳州等速拏陳正業等務獲解  
部外其劉景業一犯已准山東撫臣訥爾經額  
咨會拏獲訊有蘭山縣人看瘡治病之劉姓道

光二年間風聞被江南掣辦並不姓劉實係狄  
姓是否卽係狄文奎先經掣獲擬辦現飭查明  
另行咨覆辦理至徐州地方界連東豫皖省誠  
恐有游匪竄入傳徒必須隨時掣辦免滋煽惑  
現又據徐州鎮轉據都司丁振剛等稟稱協同  
縣役掣獲念經之王起標吳申二名起有經卷  
等情臣已劄飭江蘇臬司確訊詳辦按律懲治  
并飭嚴掣逸犯以絕根株而靖地方謹附片覆  
奏伏乞

聖鑒謹



奏

道光十二年五月十七日具

奏六月十三日奉到

硃批知道了欽此

再查商運楚西安徽等省引鹽經歷長江數千里從前偶值遭風發漏等事卽有江面匪徒乘機搬搶船戶畏累僅以淹消具報亦有船戶商廝中途盜賣匪徒卽挾制劫搶情僞多端臣疊經嚴飭沿江州縣營汛隨時訪察查拏併委員上下逡巡此風稍戢本年三月二十五日復有船戶徐義發裝運商人包咸吉楚鹽行至江西彭澤縣攔排洲地方被地棍匪徒搶劫當據該縣李本瑤會營選帶兵役健丁拏獲搶犯二十餘名併起出鹽一萬餘觔尙在追踪查拏臣以

該縣奮勉實力先記大功一次飛飭上緊嚴辦  
以靖江面茲復據署鹽運司俞德淵詳報據商  
人黃滌泰稟稱運行安徽引鹽於四月十八日  
在桐城縣地方被匪徒多人持刀上船全行搶  
劫併將船隻拆毀滅蹟船戶任萬興同押運商  
廩汪宏赴縣具報等情詳請飭拏前來臣接閱  
之下不勝駭異當卽星飛咨行嚴拏去後旋接  
據桐城縣知縣楊大綰具稟據船戶職員任萬  
興卽任朝邦具報船鹽被搶經該縣會營詣勘  
船已無存在地保聞建寅家起出鹽五包民人

劉榮華家起出鐵鋪繩纜革兵陳福家起出鹽包錢文審據船戶任萬興供認沿途盜賣行至桐城縣新開溝停泊又託劉榮華陳福等分銷被朱雙全等各駕小船爭買搶奪該船戶自將船隻捨棄漂淌現在嚴挈朱雙全等到案審辦等情與運司詳據商稟迥異是否匪徒攔江劫搶抑係船戶盜賣官鹽致招搶劫必須澈底根究大加懲創臣已飭嚴挈搶匪朱雙全等務獲併將船戶任萬興卽任朝邦捐職從九品斥革究明實在原籍居址查封家產變抵一面飭司

提審究辦或係船戶盜賣或係匪徒地棍攔江  
肆搶務照搶盜本例從嚴治罪毋許稍滋輕縱  
以肅商運而安行旅謹附片縷陳伏乞

聖鑒謹

奏

道光十二年五月十七日具

奏六月十三日奉到

硃批務要嚴行究辦極力整頓若再姑息更不寬事  
矣欽此